

**ORATIO DE
SUBROGANDO
SUMMO PONTIFICE
AD EMIN.MOS AC REU.
S.R.E. CARDINALES...**

Giacomo Rospigliosi, Bartolomeo :
da#Roma

IMPRIMATUR

Si videbitur Reuerendissimo P. Mag. Sac. Pal. Apost.

Marcellus Anania Episcopus Sutrinus, & Nepesinus V. G.

IMPRIMATUR

Fr. Raimundus Capfuecus Ord. Præd. Sac. Apost. Palatii
Magister,




SANCTISSIMO PATRI
ALEXANDRO VII.
PONT. OPT. MAX.

IACOBVS ROSPIGLIOSIVS F.



*RATIONEM à me in Pontificijs
Comitijs habitam SANCTITATIS
TVÆ Pedibus obsequentissimè sisto ,
BEATISSIME PATER. Declinaret
illa humilitatis suæ conscia sublimis-
simos oculos, quibus unica congruunt sapientiæ celestis
oracula, characteribus impressa Diuinitatis. In Augu-
stissimo tamen magnitudinis Apostolicæ fastigio ingentem
humanitatem retines, ut inter omnes dignitate, sic in om-
nes facilitate, ter Optimus, terque Maximus. Malus Ora-
tor, quam dicendo felicitatem haud poteram, non malus*

Vates præ sagiendo quæsiui. In proposito Pontificiæ Virtu-
tis exemplo, Tua, sine nomine, Purpuratis Patribus expo-
nens Merita, Tuis Meritis concordissimè suffragatura
Purpuratorum Patrum iudicia diuinabam. Citra omnem
Modestię Tuę iniuriam agnosces (non secus tamen, ac so-
lem ex umbra) optimam Virtutum Tuarum imaginem in
Orationem meam stylo transfusam, quemadmodum nunc
illā intuemur, ac fruimur in Vita, et Moribus Tuis; Men-
tem illam auream cælo parem, Sapientiam, Iustitiam, Re-
ligionem, et quę vinculum omnium est, Pontificiam Cha-
ritatem. Saluberrima SANCTITATIS TVÆ consilia ad
Christianę Reipublicę propagationem, et gloriam fortunet
DEVS.



ORATIO



QUOD magnum, quod vobis hoc tempore negotium imponitur, EMINENTISSIMI PRINCEPES, sedula cogitatione peruoluo, diuersas animum in partes, & Ordinis vestri maiestas, & procurationis pondus, & arguementi Dignitas vehementer impellunt. Video enim mihi, pro consuetudine, institutoque maiorum, de Summa Pontificis Maximi Dignitate, qua nihil in terris Augustius, nihil est Sanctius, esse dicendum; apud eos præcipuè, qui eximia Sapientia, & Diuini Spiritus præsentissima luce quidquid subijci possit auribus, animo ipsi conceptum, meditatumque iamdudum habent. Nunc igitur cum & Dignitatis in causa tantum sit, quan-

tum potestas amplissima ex Vicario Diuinitatis munere potest afferre, & ad decernendum in vobis consilij tantum, quantum Sapientissimorum iudicia Principum in maximis Christianæ Reipublicæ negotijs apprimè versata, afflataque coelitus sunt assequuta; in me autem nihil omnino facultatis, quod Conspectus vestri, quod argumenti magnitudinem, amplitudinemque persequi audeat; facile intelligo, quàm arduam, difficilemque mihi prouinciam imposueritis. Faciam igitur in hac insolita ratione dicendi, quod Sapientiæ, quod imperijs vestris, meæque tenuitati consentiat. Et quoniam per vos tanta hæc mihi causa oblata est, cum neque illam suscipere minor audeam, neque vestris debeam non obtemperare mandatis, ea indicendo proponam, quæ mentibus vestris iam pridem insita, præstantissimis consilijs, quæ insignis Sapientia vestra in grauissimo hoc negotio indubitanter pollicetur, felici præsaitione præludant.

Quæ res in Comitijs omni virtutis, & prudentiæ honestate commendatissimis animos acriter excitat, ea, quantum cogitatione,

¶

intel.

3

intelligentiaque absoluta complectimini, inexplicabilis momenti deliberatio est, in qua de summa, supremaque Reipublicæ salute decernitur. Eligendus à vobis est magnus Ecclesiæ Sacerdos, Pontifex Summus, potestate Petrus, vnctione Christus; cuius Imperium maximum, & laboriosum super humerum eius, cuius auctoritas metuenda Inferis, veneranda Superis, vno minor est Deo. Præclarum est hoc, & ad vestros animos excitandos maximè, atque inflammandos eximium; siue quod nihil illo sublimius in terris, quem vos in Pontificiæ maiestatis folio collocaturi estis; siue quod nemo non intelligit, in vestrum omnium suffragijs, ac voluntatibus suffragia cœlitum, & arcanæ Diuinitatis Imperium contineri. Testatissimum omnibus planè est, in Vaticanis Purpuratorum Patrum Comitijs mirabili quadam, excelsaque molitione adesse Altissimi manum, quæ attingens à fine vsque ad finem fortiter, & suauiter cuncta disponens, nutu, instinctuque admirabili, vota, ac studia vestra in eum Pontificem constituendum impellit, quem inscrutabili Sapientiæ suæ lege, & incompre-

hen.

hensibili viarum suarū iudicio destinauerit.

Quàm ingens autem in tam ardua re momentum superaddit Christianę Reipublicę luctuosa conditio? cuius salus, & dignitas ob immentam periculorum magnitudinem eum à vobis Pontificem expetit, cuius præcipua virtute, sapientia salutarī, auctoritate summa, assidua vigilantia omnes hostium impetus, omnes Inferorum conatus sæliciter comprimantur. Circumspicite, si libet, Patres Amplissimi, accurateque lustrate terrarum Orbem, hoc est vberriam Pontificiæ sollicitudinis segetem. Quanta pars nascentis, occiduique Solis lumine circumfusa iacet in tenebris, & vmbra mortis? Quot, quantisque Ethnicorum incurfibus, perduellium Hæreticorum, transfugarumque machinis, quantis errorum concussa turbinibus agitur Ecclesia super hanc Petram edificata? Videbitis, quem in tam graui germanę fidei, salutisque vniuersę discrimine deligere debeatis, qui vnus lethales hæresum fraudes in apertum conijciat, hostium tela retundat, scelerum pestem extinguat, & quod caput est, latentia in his omnibus inferni prædonis machinamen-

ta comminuat. Dum enim disjunctissimis in locis, longèque diuersis vno, vndequaquē consilio, Catholicorum excidia anhelantes, Othomannicus furor, Hæreticorum versutia, & potestas tenebrarum immane Ecclesiæ bellum intendunt; eo potissimum opus est, qui gladio nos salutis accingat, & è formidabili Diuinitatis armentario vnus ipse miles promat assidue clypeos, & adamantinam fortium armaturam. Qui, Coelesti ope suffragante, Principum inter sese dimicantium, dissidijs compositis, inflatoque Cæli classico, illos ad suscipiendam Religionis causam contra communem hostem, ad præliandum cum virtute prælium Domini, Cæli Interpres inducat; vt & pacē tandem, quam diu consentanea bonorum omnium vota deposcunt, & perenni incolumitate Ecclesia perfruatur. Decernendū igitur nunc est ab Amplissimo Cœtu Vestro, quis Christianæ Reipublicæ summum Imperium administrare, in Petri nauī federe, clauum gerere periculoso navigationis in cursu debeat, vt maris in altitudinem veniens tempestatem non metuat; quis responsa sacrorum, veritatis scita, & oracula

iubeat Religionis; & vocis, & vitæ Dignitate,
humana in specie Dei vices exhibeat. Nam
& si animata Dei in terris imago sunt Principes,
Summorum tamen in ore Pontificum,
magnum, multumque Diuinitatis instar, quin
imò Diuinitatem ipsam latentem, loquen-
tem spectat, & audit venerabundum genus
humanum. Hoc enim Capite, hoc Ore, hac
Lingua ad audiētem mundū loquitur Deus.
Quamobrem ex ea, quæ singulis Vestrum
ineſt Sapientia, atq; eximio pietatis Zelo, ta-
lem profectò daturi estis Ecclesiæ Patrem,
qualem intelligitis, Catholicę Fidei præſidiū,
difficilem Christianæ Reipublicę statum,
Dignitatem demum Altissimi Vicariam
Numinis postulare. Eum scilicet, qui Sancti-
tate morum, consiliorum Prudentia, Chari-
tatis studio conspicuus, quantò cæteris omni-
bus Dignitate, tantò Virtutibus antecellat.
Absoluta certè numeris omnibus Virtutum
complexione pollebit ille, quem animi vestri
prudentia, efficaci Diuini Spiritus afflatu im-
pulsus, tanquam lucem in augustissimo culmi-
ne Solij Vaticani constituet, vt omnibus, qui
in Domo Dei sunt, ad exemplum Sanctitatis

eluceat. Celsum profectò hæc vna mens
 est, atque sententia; quorum indulgentissima
 opportunitate factum censeo, vt qua luce fœ-
 licissima Principis Apostolorum Maiestatis,
 in Vrbe Gentium Regina fundatæ, positæ-
 que Sedis Memoria recolitur, eadem Vos ad-
 deligendum eum, qui Petri obtineat in Im-
 perio Locum, Pōtificia Comitia ingrediami-
 ni. O fortunata per Vos Christianæ Reipu-
 blicę tempora, quę Pontificem spectabunt,
 qui in summa potestate, nihil amplius velit si-
 bi licere, quàm alijs, In quo non tam gloria
 potestatis, quàm moderatio celebretur; cuius
 paternæ Charitas, atq; insignis Prudentia ni-
 hil sibi proponat antiquius, quàm omnia
 summa ratione ducere, rerum Diuinarum
 gloriæ impensè consulere, offensionum vita-
 re pericula, perpetua negotiorum mole om-
 nium se commodis impendere, æmulari so-
 lem, qui statim accepta luce, se in orbem cę-
 pit rotare, perniciq; cursu cūctas mūdi plagas
 illuminaturus euolauit; ex altissimo demum
 Vaticani Solio Regna, Nationes, Imperia, pro-
 rerum, personarum, ac temporum varietate,
 Diuinęq; Charitatis lege dirigere, ac tēperare.

Quæ cum ita vobis perspicua sint, EMI-
NENTISSIMI PRINCIPES, eaq; melius impressa
 animo, quàm auribus insinuata, per summam
 Dignitatem, quam geritis, per immensę pie-
 tatis magnitudinem, qua polletis, per eum,
 cuius huc in nomine conuenistis, postulat à
 Vobis speciosissima Christi Sponsa, & aman-
 tissima Mater Ecclesia, vt (quandoquidem è
 vestro pendet consilio) humanis affectibus
 sepositis, ac Diuina dumtaxat præ oculis obie-
 cta Gloria, quã primùm licuerit, eum Ponti-
 ficis Maximi delectum statuatis, quem totius
 Orbis plausus, quem Ecclesiæ commoda, &
 (quę cumulatissima optimi consilij com-
 mendatio est) lætitia Cœlitum consequatur.

